

Prome Ministro Nel Oduber ta sumamente orguyoso cu develo di estatua di Betico Croes

STA. CRUZ – Den un entrevista cu Prome Ministro, sr. Nel Oduber en conexion cu e develo di estatua di Betico Croes, nos Libertador, el'a comenta cu esaki ta culminacion di henter un proceso cu a start cu fundacion di MEP, dia 9 di Februari, 1971 y despues cu culminacion den cu e

Conferencia di Mesa Rondo, unda cu den e proceso ey, awe den feliz memoria Betico Croes a base di un vision pa Aruba tin su propio himno, su propio bandera, su propio ortografia y al final propio pais, propio moneda, propio gobierno, propio parlamento, tabata algo grandi despues cu nos a haci 18 di Maart un dia nacional y tur aña nos a keda celebra 18 di Maart dia di nos himno y bandera. Su Excelencia ta sigui bisa: "Tur pais na mundo, cada 100 aña bo ta haya un heroe grandi den e taya di Betico Croes. Ta pesey awor cu nos ta yegando e fecha di 30 aña di Himno y Bandera, Nos ta celebra 20 aña di Status Aparte, 20 aña cu el'a fayece, esaki ta e regalo di mas grandi cu nos gobierno a duna nos pueblo, pero tambe e fundacion cu su yiu y familiarnan tin, pa un dia asina grandi y asina bunita. Pabien na nos pueblo, danki na nos creador cu a duna nos un lider grandi asina, un



estadista y tambe na su famia cu a presta pueblo pa e traha asina hopi.

Mi ta sintimi hopi orguyoso. Mi tabata tey for di inicio. Mi a bay tur e conferencianan cu tabata tin, cumbre, mesa rondo, mi tabata coordinador pa prepara Status Aparte, mi tabata diputado encarga cu Himno y Bandera, mi tabata sa kico nos a pasa aden. Pesey ora mi mira e hendenan den tur tranquilidad, mi ta hopi contento. Ora nos a inicia e tabata tin polarizacion di hende, no a mira e himno y bandera cu berdad ta balornan inmanehabel, un balor spiritual pa unifica un pueblo, pa bo mira e símbolo di libertad. Mi kier a felicita henter e pueblo pa e logro asina bunita. Un estatua tin un significacion special.

Den dje mester mira cu e persona a bay laga nos, pero mentalmente y emocionalmente nos ta keda cu su pensamentonan, su perseverancia, su fe y su determinacion, su vision. Mira den dje loke bo ta mira bon pa bo pais, nos ta hopi contento cu hopi hende por a haci e trabao aki.

E estatua ta hopi bunita y impresionante.

E estatua nota completamente cla, pero Betico merece esaki, mescos cu na Aruba nos tin estatua di hendenan cu mayoria di Arubiano

nunca a bisa cu nan conoce. Nan conocenan pa historia. Pero Betico un gran mayoria di hende conoce personalmente. Berdad e ta yenabo cu hopi emocion alegria y mi ta hopi orguyoso ta parti di e historia aki.



*Comision Celebracion Dianan Nacional***Develo di estatua di nos Libertador Betico Croes a resulta den un exito rotundo**

STA. CRUZ--Un publico hopi grandi a asisti diasabra anochi na e develo di e estatua di nos Libertador Betico Croes y esaki siguramente a yena Ministerio di Labor, Cultura y Deporte y Comision Celebracion Dianan Nacional (CCDN) cu hopi orguyo y satisfaccion. Tabata un anochi sumamente emocional y pa un rato e publico presente a kere cu ta Betico mes tabata presente riba e plaza. Hopi ta esnan cu a yora di emocion na momento cu e develo a tuma lugar.

Cu nan presencia en grande e publico presente a duna muestra di gratitud pa tur loke Betico Croes a haci pa e pueblo Arubano y manera a wordo bisa anteriormente e estatua aki lo keda como un testimonio bibo di e union di e pueblo Arubano. Tanto e Ministerio y e Comision menciona ta gradici un y tur sin excepcion cu a contribui pa realiza e gran anochi aki y ta suplica un y tur den comunidad pa yuda conserva

e plaza y e estatua di nos Libertador.

Sinembargo e celebracion no a termina y ta continua e siman aki cu e gran celebracion di nos Dia Nacional, nos Dia di Himno y Bandera.

FERIA PATRIOTICO:
DIAHUEBS 6:00 pm. NA SAN NICOLAS

16 di Maart
Esaki ta cuminsa diahuebs anochi 6:00 den e distrito di San Nicolas na e plaza banda di CMB, diabierna for di 6'or di atardi te cu 10'or di anochi riba Plaza Libertador Betico Croes y diasabra mainta for di 9'or te cu 1'or di merdia tambe riba e Plaza menciona.

Na tur e celebracionnan aki CCDN ta spera cu e publico lo asisti masalmente y asina demonstra nan amor patrio.

Tambe un suplica ta bay pa dorna tur e vitrinanan di e tiendanan y pa no lubida di pone e bandera Arubano na e cas y autonan.



Develo di estatua di nos Libertador Betico Croes

